

nant Alarcone, & François Vasques, la plus part Capitaines Espagnols, en ont décrit, la narration desquels a esté imprimée tant a Paris, Lion, que Venise, & depuis recueillie par le gloseur ordinaire, & inserée en la nouvelle Cosmographie de Sebastien Munster. Quant à moy ayant illustré & rengé, avec la mesme methode & suite qu'avez peu voir en la presente histoire, ce que les auteurs precedens n'ont obserué ne gardé, & redigé par escript, sans m'amuser aux vieilles fables & mensonges tragiques, vous assurez n'auoir rien voulu mettre en lumiere sinon ce que occulairement i'ay veu ou entendu estant és pays desquels ie vous ay en plusieurs autres endroits parlé, sans beaucoup me soucier de la mignotise du langage, qu'il faut apprendre dans les labours de ceux qui en font profession, tant à fin que ma diligence fust plus auctorisée & approuée, que pour n'estre enrollé entre ceux qui pillent les labours d'autrui, ne ressemblé aux larrons, lesquels ayans desrobé quelque vesselle d'or ou d'argent, ostent la marque de peur qu'elle ne soit recongneue. Parquoy ie rends graces a ce bon Dieu tout puissant, recongnissant les biens infinis qu'il ma faitz de m'auoir preserué de tant de perils, ausquels ie me suis exposé, visitant les quatre parties de l'vniuers, priant le lecteur prendre ce mien petit labour & rude stile en bonne part.



FIN DE LA QUATRIESME  
PARTIE DV MONDE.

